

मार्निंग डोगरी न्यूज़ बुलेटिन, सभें. **09-20** Hrs

<><><><><><>

Headlines

- बारामुला जिले च होए दे आतंकी हमले च 2 जुआन शहीद होए ते 2 पिट्ठुएं दी मौत होई गई ऐ जिसलै के 3 होर जख्मी होई गे न।
- उपमुख्यमंत्री सुरिन्द्र कुमार चौधरी होरें जम्मू कश्मीर च बेरोजगारी दूर करने लेई कौशल विकास गी तेज करने दा आह्वान कीता ते नोजवानें तगर पुज्ज बनाने दे निर्देश दित्ते।
- ट्रांसपोर्ट मंत्री सतीश शर्मा होरें ट्रांसपोर्ट मैहकमे दे कम्मकाज दी समीक्षा करदे होई नमें बचार गी शामिल करने पर जोर दित्ता।
- पंचैती राज मैहकमे दे निदेशक होरें पूरे जम्मू कश्मीर च ग्रामीण बुनियादी ढांचे दी परियोजनाएं दी स्थिति दी समीक्षा कीती।

<><><><><><>

Terror Attack

बारामुला जिले च कल संजा होए दे आतंकी हमले च 2 जुआन शहीद होई गे। इस हमले च 2 पिट्ठुएं दी बी मौत होई गई ते त्रै दुए जने घायल होए न। इनें त्रौनें घायलें दा इलाज अस्पताल च चला'रदा ऐ। सेना दी चिनार कोर नै सोशल मीडिया पोस्ट च दस्सेआ जे बारामुला इलाके च आतंकवादिएं ते सुरक्षाबलें बश्कार गोलीबारी होई। आतंकवादिएं पैहले सेना दी गड्डी उप्पर हमला कीता। उपराज्यपाल मनोज सिन्हा होरें सेना, जम्मू कश्मीर पुलस ते सिविल प्रशासन दे उच्च अधिकारिएं दे कन्नै गल्ल कीती। उनें आतंकवादिएं दे सफाए लेई बनकदी ते लोड़चदी कारवाई करने दा आदेश दित्ता ऐ। उनें बारामुला दे डिप्टी कमीशनर होरें गी हमले च मारे गेदे सेना दे पिट्ठुएं दे परोआरें गी हर संभव मदाद पताने लेई गलाया। उपराज्यपाल होरें पीड़ित परोआरें कन्नै अपनी हमदर्दी जाहर कीती।

<><><><><><>

Dy CM

उपमुख्यमंत्री सुरिन्द्र कुमार चौधरी होरें श्रम, रोजगार ते हुनर विकास मैहकमे दी इक जायजा बैठक लाई। उनें जम्मू कश्मीर दे युवाएं दे हुनर विकास गी बेहतर करने ते इस कम्मै च तेजी आनने पर जोर पाया। एह्दे राएं युवाएं लेई रोजगार दे नमें मौके पेदा होंगन। उनें इस गल्ला पर जोर पाया जे हुनर विकास सरबन्धी कोर्स युवाएं गी सशक्त बनाने च महत्वपूर्ण भूमिका नभागन ते एह्दे मगरा युवा नौकरी मंगने आले नेई सगुआं नौकरी देने आले बनी जांगन। उपमुख्यमंत्री होरें श्रम मैहकमे दी स्कीमें दी कारगर ते बेहतर ढंगै सिर अमलावरी पर जोर पाया। तां जे लक्षित लोकें गी लाह थोई सकै। उनें समें-समें पर उद्योगिक इकाइएं दा जायजा लैने पर बी जोर पाया तां जे उत्पादन इकाइएं बारे प्रतिक्रिया हासल होई सकै।

<><><><><><>

Dy CM Mining

उपमुख्यमंत्री सुरिन्द्र कुमार चौधरी होरें जम्मू कश्मीर च गैर कनूनी खनन पर पूरी चाल्ली पाबन्धी लाने दी जरूरता पर जोर पाया ऐ। उनें खनन च पूरी चाल्ली पारदर्शिता ते लवाबदेही जकीनी बनाने पर जोर पाया। तां जे संसाधने दा बेहतर ते कारगर एंगै सिर इस्तेमाल होई सकै ते एह्दे राएं दे आर्थिक विकास ते लोकें दे हित आस्तै विकास जकीनी बनोग। सिविल सचिवालय च लग्गी दी बैठक च चौधरी होरें अफसरें गी हिदायत कीती जे ओह पर्यावरण दे संतुलन सरबन्धी चिंताएं गी तरजीह देन, खास तौर पर खनन ब्लाकें दे आवंटन लेई। इस दरान इलाके दे पर्यावरण, उत्थुआं दी जैव विविधताएं दा ध्यान रखेआ जाना लोडचदा। उनें इस दरान पानी दे कुदरती संसाधने गी दूषित होने थमां बचाने लेई बी गलाया। उपमुख्यमंत्री होरें जम्मू कश्मीर च खनन गी बेहतर ढंगै सिर ते जिम्मेदारी आले तरीके कन्नै करने लेई जोर पाया तां जे टिकाऊ विकास होई सकै ते पर्यावरण दी हिफाजत बी जकीनी बनी सकै।

<><><><><><>

Transport Department

ट्रांसपोर्ट मंत्री सतीश शर्मा होरें सिविल सचिवालय श्रीनगर च जम्मू कश्मीर शिड़क यातायात कारपोरेशन ते स्टेट मोटर गैराज मैहकमे दे अलावा ट्रांसपोर्ट मैहकमे दे कम्मकाज दी समीक्षा रेई इक बैठक दी अध्यक्षता कीती। मंत्री होरें मैहकमे गी निर्देश दित्ता जे ओह बेरोजगार युवाएं दी आजीविका कमाने लेई प्रोत्साहित करन। उनें परमट फीस गी 50 प्रतिशत करने लेई गलाया, एह् फीस 1 लख 50 ज्हार रपे ऐ ते उनें इसी 75000 रपे करने लेई गलाया। मंत्री होरें एह् बी हिदायत दित्ती जे व्यवसायिक गड्डिएं दे डरैवरें दी हर म्हीने मैडिकल जांच दा आयोजन कीता जा तां जे गड्डियां चलाने लेई उंदी फिटनैस ते योग्यता जकीनी बनाई जाई सकै। उनें शिड़क परिवहन प्राधिकरण गी बी निर्देश दित्ता जे ड्राइविंग टैस्ट दरान लाइसेंस जारी करदे बेल्ले सख्त उपाह जकीनी बनान।

उनें ड्राइविंग लाइसेंस आवेदन दे हुनर परीक्षण गी जकीनी बनाने लेई आईडीटीपी परियोजना गी तोले शा तौले पूरा करने पर जोर पाया। उनें प्रदेश च सार्वजनिक परिवहन प्रणाली च सुधार करने लेई मुत्तलका मैह्कमे गी किट्ठे रलियै कम्म करने दी हिदायत दित्ती।

<><><><><><>

CJI

न्यायमूर्ति संजीव खन्ना होर भारत दे अगले प्रधान न्यायधीश होंगन। विधि मंत्री अर्जुन राम मेघवाल होरें सोशल मीडिया दी इक पोस्ट च आखेआ जे राष्ट्रपति द्रौपदी मुर्मू होरें प्रधान न्यायधीश डी.वाई.चन्द्रचूड़ हुंदे कन्नै सलाह मशवरे परेंत न्यायमूर्ति खन्ना होरें गी 11 नवम्बर थमां भारत दा प्रधान न्यायमूर्ति नियुक्त कीता ऐ। ओह देसे दे 51में प्रधानउ न्यायधीश होंगन ते अगले ब'रे 13 नवम्बर गी सेवानिवृत होई जांगन। न्यायमूर्ति संजीव खन्ना होरें 18 जनवरी 2019 गी सर्वोच्च अदालत दे न्यायधीश दा औहदा सांभेआ हा। इस दरान उनें सर्वोच्च अदालत दे बक्ख-बक्ख संविधान पीठ च कम्म कीता ते नमें महत्वपूर्ण फैसले कीते। उंदे फैसले दे व्यक्तिगत आजादी दी प्राथमिकता ते मजबूत लोकतांत्रिक भागीदारी गी प्रमुखता मिली। न्यायमूर्ति चन्द्रचूड़ होर 9 नवम्बर 2022 गी भारत दे प्रधान न्यायधीश दा औहदा सांभेआ हा ते ओह औंदी 10 नवम्बर गी सेवानिवृत होआ करदे न।

<><><><><><>

Cooperative Department Ramban

रामबन जिले च सहकारिता मैह्कमा लोकें दी जीवन स्तर गी बेहतर बनाने लेई ते उंदी आर्थिक, समाजिक जे सांस्कृतिक जरूरतें गी पूरा करने च वचनबद्ध ऐ। इस्से सिलसिले च विभाग नै रामबन जिले दी हर इक पंचैत च नमें बहुउद्देशीय पीएसीएस यानि प्राथमिक कृषि ऋण सोसायटी डेयरी ते मच्छी पालन सहकारी संस्थाएं दे गठन ते मजबूती सरबन्धी मार्गदर्शन कार्ययोजना गी शुरू कीता ऐ। असले जित्थें रामबन च 13 पीएसीएस न, जिंदे च बड़ी गिनतरी च ग्राम पंचैत शामिल न।इस बारे होर जानकारी देआ करदियां न कोपरेटिव सोसायटी दियां डिप्टी रलिस्ट्रार

<><><><><><>

Panchayati Raj

पंचैती राज मैह्कमे दे निदेशक शामिल लाल होरें पंचैती राज सरिस्ते गी मजबूत बनाने लेई चलाए गेदे केई सारे जतनें दी प्रगति दा जायजा लैता। बैठक दरान मुख करी ध्यान पंचैत घर ते सीएससी पर दित्ता गेआ। इस दरान जिला पंचैत संसाधन केन्द्रें गी कायम करने पर बी चर्चा होई। उनें एसीपी गी चला'रदे पोजेक्टें गी समें सिर पूरा करने लेई आखेआ तां जे ग्रामीण ते दूर दरेड़े इलाकें च रवा'रदे लोकें गी सेवाएं दी दस्तोयाबी सेई ढंगै सिर होई सकै। एह्दे राएं ग्रामीण लोकें गी डिजीटल सेवाएं तगर पुज्ज सखल्ली ते बेहतर होग।

<><><><><><>

DC-Poonch

लोकें दिएं शकैतें ते परेशानिएं गी दूर करने लेई जिला प्रशासन पुंछ नै ब्लाक लसाना सुरनकोट च लोकें तगर पुज्ज बनाने आला इक आउटरीच कार्यक्रम दा सरिस्ता कीता। डिप्टी कमीशनर विकास कुंडल हुंदी अगुवाई च मुत्तलका मैह्कमे दे अफसर जिला ते सेक्टर अधिकारी बी उत्थें मजूद हे। तां जे लोकें दी शकैतें गी दूर कीता जाई सकै ते समाज दे खीरले माहनु तोड़ी राबता कायम करना जकीनी बनी सकै। लोकें डिप्टी कमीशनर हुंदे सामने अपनी परेशानिएं गी उजागर कीता। गल्लबात दरान उनें रोजमर्रा दे जीवन गी प्रभावत करने आले केई मुद्दें पर लोह पाई। उनें लोकें दे जीवन दी गुणवत्ता च सुधार आनने लेई प्रशासन दी प्रतिबद्धता गी फही पक्का कीता।

<><><><><><>

Handicraft Reasi

रियासी दे हथखड्डी ते दस्तकारी मैह्कमे नै कल ठाकराकोट दे आकांक्षी ब्लाक च इक जागरूकता कार्यक्रम दा सरिस्ता कीता तां जे मैह्कमे आस्सेआ पेश कीती जाने आली बक्ख-बक्ख योजनाएं ते सिखलाई कार्यक्रमें बारे लोकें गी जानकारी दिज्जी जाई सकै। एह् कार्यक्रम दस्तकारी ते हथखड्डी दे क्षेत्र च जुड़े दे कारगिरें, बुनकर जे मकामी समुदाय गी समर्थन देने दे जारी जतनें दा हिससा हा। इस मौके पर सहायक निदेशक उज्जवल सिंह सम्बेयाल होरें मकामी समुदाय कन्नै गल्लबात बी कीती। उनें कारीगिरें ते बुनकरें गी हुनर विकास कार्यक्रमें माली मदाद देने ते उनेंगी मंच देने लेई मैह्कमे दा प्रतिबद्धता पर जोर दित्ता। सहायक निदेशन होरें लोकें गी प्रोत्साहित कीता जे ओह् अपने रोजी रूट्टी कमाने ते इस क्षेत्र दी सगोसार संस्कृति ते विरासत गी बचाने लेई उपलब्ध मोके दा इस्तेमाल करन।

<><><><><><>

DM Samba

भारतीय नागरिक सुरक्षा संहिता दी दफा 163 तैहत् सांबा दे जिला मैजिस्ट्रेट राजेश शर्मा होरें सांबा जिले दे अंतर्रायश्ट्रीय बन्ने कननै लगदे 2 किलोमीटर दे दायरे च हर चाल्ली दे पटाखे दी बिक्री ते इंदे इस्तेमाल पर पाबंदी लाई दित्ती ऐ। एह आदेश फौरी प्रभाह कन्नै लागू होई गेआ ऐ ते आदेश दी तरीक थमां 2 महीने लेई जारी रौह्ग।

<><><><><><>

Samba Awareness

भिड्ड पालन विभाग जम्मू थमां समग्र कृषि विकास कार्यक्रम तैहत् नसल आधारित खेत्तरें बारे इक जागरूकता ते परामर्ष शिविर दा आयोजन कीता गेआ। इस कैप दा आयोजन जम्मू संभाग दे उद्यमिऐं, कृषि उत्पादन संगठने ते मुत्तलका कर्मिऐं लेई करथोली सांबा च कीता गेआ। इस कैप च योजनाएं तैहत् लाह हासल करने लेई बड़ी मती गिनतरी च करसानें हिस्सा लैता। उनें मैह्कमे ते नाबार्ड दे वरिष्ठ अफसरें कन्नै गल्लबात कीती, योजनाएं बारे जानकारी हासल कीती। इस मौके पर नाबार्ड दे डीडीएम शालेश शर्मा होरें करसानें गी किसान क्रेडिट कार्ड टर्म लोन ते ईपीओ जनेही बक्ख-बक्ख योजनाएं बारे जानकारी दित्ती ते इंदे फायदे बारे दस्सेआ दसाया। उनें इस गल्लबात दरान करसानें दे बक्ख-बक्ख सरबंधी मुद्दे गी बी संबोधत कीता।

<><><><><><>